

Pusat Bencana Geologi Negara ditubuh akhir tahun



Pusat Bencana Geologi Negara bakal pantau tahap keberkesanan sistem amaran awal bencana tsunami, banjir dan tanah runtuh. (Foto hiasan)

Kuala Lumpur: Pusat Bencana Geologi Negara akan ditubuhkan pada akhir tahun ini bagi memantau tahap keberkesanan sistem amaran awal bencana tsunami, banjir dan tanah runtuh.

Datuk Seri Anwar Ibrahim berkata, penubuhan pusat itu juga bertujuan meningkatkan kecekapan tindak balas bencana demi memastikan keselamatan rakyat.

“Kerajaan prihatin dengan bencana banjir dan tanah runtuh yang sering berlaku, jadi akan terus memberi tumpuan terhadap usaha untuk melindungi rakyat,” katanya ketika membentangkan Kajian Separuh Penggal Rancangan Malaysia Ke-12 (KSP RMK12) di Dewan Rakyat, semalam.

Perdana Menteri berkata,

Dasar Pengurusan Bencana Negara bawah kawal selia Agensi Pengurusan Bencana Negara (NADMA) juga akan disemak semula untuk memperkukuh kesiapsiagaan dan meningkatkan keupayaan dalam pengurusan bencana.

Beliau berkata, usaha khusus untuk melindungi spesies Harimau Malaya (*panthera tigris jacksoni*) yang kini semakin terancam, juga dipertingkatkan.

“Malaysia satu-satunya rana habitat Harimau Malaya di dunia. Inisiatif ini penting bagi memastikan keseimbangan ekosistem supaya kemampunan alam terjamin.

“Pada masa sama, penguatkuasaan dalam menangani jenayah pemburuan haram, memperluas kawasan perlindungan dan memberdaya komuniti

tempatan akan diperhebatkan dalam usaha melindungi hidupan terancam lain seperti gajah, orang utan, penyu, seladang dan tapir,” katanya.

Sementara itu, Anwar berkata, kerajaan akan mempertingkatkan usaha memperluas pelaksanaan Matlamat Pembangunan Mampan (SDG) pada peringkat tempatan dengan memperkasa kerajaan negeri, pihak berkuasa tempatan (PBT) dan komuniti setempat.

“Selain itu, prinsip alam sekitar, sosial dan tadbir urus (ESG) merangkumi dasar serta rangka kerja kawal selia dan khidmat sokongan, akan dibangun bagi menggalakkan perniagaan terutama perusahaan kecil dan sederhana (PKS) untuk menerima pakai amalan perniagaan mampan,” katanya.